



CUMÜN DA SENT



# Il mas-chalch da Sent

Publicaziuns officialas. Cumpara segund bsögn.  
2012-2014  
no. 22

7554 Sent, 19 settember 2013

## Radunanza cumünala

La radunanza ais gnüda fixada sün **gövgia, als 17 october 2013, a las 20.15**, in chasa cumünala.

### Tractandas:

1. Protocol da la radunanza cumünala dals 4 lügl 2013
2. Proget forestal Val Vallorcha / object supplementar SIE 13/14  
Dumonda per ün credit supplementar da fr. 120'000.00
3. Adattamaint zona da quietezza god Darsüra
4. Proget da fusiun Ardez – Ftan – Guarda – Scuol – Sent – Tarasp  
Orientaziun sur dal stadi e l'andamaint dal proget
5. Orientaziuns
6. Varia

## Cussagl cumünal

## Tscherchè üna caluostera obain ün caluoster

Il Cumün da Sent e la Corporaziun evangelica tscherchan üna persuna chi'd ais pronta da surtour il servezzan resp. las incumbenzas da caluoster

**a partir da subit obain segund cunvegna.**

L'incumbenza po ev. eir gnir scumpartida sün duos personas.

### Annunzchas:

Persunas interessadas per quella lezcha dessan s'annunzchar in scrit fin il plü tard als **11 october 2013** pro l'administraziun cumünala da Sent, 7554 Sent.

Chavazzin sülla busta:

„Caluoster“

Infuormaziuns:

Administraziun cumünala,  
sar rav. Jörg Büchel,

tel. 081/861 20 65 opür  
tel. 081/864 87 28.

**Cussagl cumünal  
Corporaziun evangelica**

## Da dar a fit

A partir da subit o tenor cunvegna ün' abitaziun da 2 ½ stanzas cun piazza da parcar e s-chodamaint da fuond. Fit al mais frs. 850.--. Interessents s'annunzchan per plaschair suot tel. 043 305 99 38 o 079 403 29 88.

**Tina-Milla Vulpi**

## Da dar a fit

A partir dals 1. november 2013 ün' abitaziun da 4 ½ stanzas cun lobia, chadafö da lavar, schler e piazza da parcar. Predsch al mais incl. spaisas frs. 1'650.--. Interessents s'annunzchan per plaschair suot tel. 081 864 07 29 o 079 535 16 25.

**Georg Koch**



## **Ballar per duonnas - jazzdance & streetdance**

**Mincha lündeschdi, da las 19:00h -20:00h illa sala cumünala.**

Nus cumanzain davo las vacanzas d'utuon, als 21 october 2013.

Cuosts: 100.00 l'on

Annunzchas: pro Martina Weiss-Lorenzi: 081 860 03 28  
opür suot [martina@kinesiologie-chleeblatt.ch](mailto:martina@kinesiologie-chleeblatt.ch)

**Martina Weiss-Lorenzi**

## **Vacanzas da pratcha dal meidi / Praxisferien**

La pratcha dal meidi ais serrada da **gövgia, als 3 october 2013 fin dumengia, als 20 october 2013.** Sur il nomer d'urgenza dals meidis da chasa d'Engiadina Bassa **081 864 12 12** vegnan Els/Ellas colliats/colliadas d'ürant 24 uras al di e 7 dis l'eivna directamaing cul meidi da chasa chi ha servezzan.

Die Arztpraxis bleibt von **Donnerstag, 3. Oktober 2013 bis Sonntag, 20. Oktober 2013** geschlossen. Über die Notfallnummer der Hausärzte des Unterengadins **081 864 12 12** erreichen Sie rund um die Uhr an 7 Tagen der Woche direkt den diensthabenden Hausarzt.

**Dr. med. Iris Zürcher**

## **Marchà d'utuon 2013**

Sco minch' on ha lö eir quist on a Sent in Plaz il marchà d'utuon. Il termin ais in **sonda, als 5 october 2013 da las 10.00h fin a las 16.00h.**

Annunzchas ed infuormaziuns piglia incunter duonna Nadja Demonti-Ritz – Telefon 078 829 53 35.

**Il comité**

## **Invid**

**Als 12 october 2013** driv eu las portas da meis atelier a Bögliet (illa garascha da la chasa Vital) per tuot las interessentas ed interessents. Forsa ch'ün o l'oter s'ha fingià dumandà che ch'eu fetsch in quel misterius "center per cultura contemporana applichada" (Zentrum für angewandte Gegenwartskultur)?

**Als 12 october 2013 da las 10.00h fin las 20.00h** daja l'occasion da dar ün cuc e da star da cumpagnia cun alch da baiver e da piclar. Eu m' allegr da minchün/a chi passa.

**Werner Graf**

## **Sent Turissem tschercha**

Üna persuna chi organisescha quist inviern l'aperitiv per noss giasts. Quel ha lö mincha dumengia obain mincha lündeschdi a las 17.30h.

Implü tscherchaina inchün chi muoss'a noss giasts da cuschinar trats Engiadinais. Quai ha lö mincha marcurdi a las 18.00h.

Per ulteriuras infuormaziuns staina gugent a disposiziun / tel. 081 861 88 29.

**"Gäste - Info" Sent**

## Palperi vegl

In marcurdi, als 2 october 2013 a partir da las 08.00h vain ramassà il palperi vegl.

Attenziun! Tenor las directivas da la Pro Engiadina Bassa pudaina ramassar be plü palperi lià in faschs cun cordas chi tegnan. (Sachs e tas-chas da plastic e da palperi sco eir chartun nu sun admiss).

## La magistraglia ed ils scolars

## Püschain per duonnas cun referat

In sonda, ils 2 november 2013 ha lö darcheu sco minch'on il püschain da duonnas a Scuol. Davo ün bun püschain accumpognà cun musica instrumentala referischa duonna Ruth Bai-Pfeifer davart il tema: „Fiduzcha in sai sves“.

Ruth Bai-Pfeifer da Jona SG ais maridada e viva daspö sia naschentscha cun üna malatia extraordinaria da la musculatura. Dal 2006 ais ella gnüda amalada da cancar dal bruost. Ella ais referenta e pastura, fa scolaziuns per creschüts e maina la lavur cristiana „cretta ed impedimaint“ in Svizra. Implü ha ella scrit trais cudeschs.

Co as poja megldrar la fiduzcha in sai sves? Propostas daja daplü co avuonda. Aint illa società dependa la sgürezza da sai sves per gronda part da las aignas prestaziuns. Blera o paca fiduzcha in sai sves vain pel plü masürada cul agen success.

Però che esa schi nu's es incurunà da success? Che esa cun quels chi nu reuschischan, adonta da buns cussagls e bler incuraschamaint? Che esa cun quels, chi han gnü da patir in lur infanzia suot gronda ingüstia? Che esa cun tuot quels chi sun pertocs da malatia o eir da defuormaziuns corporalas? Ston quels umans capitular? O daja per els üna schanza da rinforzar lur fiduzcha in sai sves? **Schi, i da spranza – eir per quels umans.**

Al püschain chi ha lö da **las 08.30h fin las 11.00h** illa sala polivalenta da la Chasa Puntota a Scuol sun invidadas duonnas da minch'età. Pels uffants ais organisà ün servezzan da chüra cun üna pitschna marena (collecta libra).

Organisà vain l'arrandschamaint da differentas duonnas da las baselgias naziunalas e libras.

**Annunzchas piglia gugent incunter fin venderdi, als 1. november 2013 a las 14.00h, duonna Jolanda Thanei, telefon 081 858 59 64 o 079 193 30 36. Cuosts fr. 18.-- / persuna.**

## Società dal püschain da duonnas

## 2. avis – Leger giò l'ura da l'aua

Per simplifichar la lavur da leger giò l'ura da l'aua, dà il Cumün a mincha possessur da chasa la pussibilità da leger giò svesa l'ura da l'aua e d'indichar il stadi actual al büro cumünal fin il plü tard ils **27 settember 2013**. Il Cumün as resalva il dret da far controllas da las indicaziuns.

### Indicaziun – ura da l'aua 2013

Stadi da l'ura da l'aua: ..... als .....

Chasa no. .... Possessur: .....

Quist fögl po gnir büttà aint illa chartera dal Cumün pro l'entrada da la chasa cumünala.